

# Odluka kojom se donosi Zakon o platama i ostalim naknadama sudija i tužilaca u Republici Srpskoj

**Koristeći se** ovlaštenjima koja su mu data članom V Aneksa 10 (Sporazum o civilnoj implementaciji Mirovnog ugovora) Općeg okvirnog sporazuma za mir u Bosni i Hercegovini, prema kojem je visoki predstavnik konačni autoritet u zemlji u pogledu tumačenja pomenutog Sporazuma o civilnoj implementaciji Mirovnog ugovora; i posebno uzevši u obzir član II. 1. (d) gore navedenog Sporazuma, prema kojem visoki predstavnik “pruža pomoć, kada to ocijeni neophodnim, u iznalaženju rješenja za sve probleme koji se pojave u vezi sa civilnom implementacijom”;

**Pozivajući se** na stav XI. 2. Zaključaka Konferencije za implementaciju mira održane u Bonu 9. i 10. decembra 1997. godine, u kojem je Vijeće za implementaciju mira pozdravilo namjeru visokog predstavnika da iskoristi svoj konačni autoritet u zemlji u pogledu tumačenja Sporazuma o civilnoj implementaciji Mirovnog ugovora kako bi pomogao u iznalaženju rješenja za probleme, kako je prethodno rečeno, “donošenjem obavezujućih odluka, kada to bude smatrao neophodnim”, u vezi sa određenim pitanjima, uključujući (u skladu sa tačkom (c) ovog stava) i “mjere u svrhu osiguranja implementacije Mirovnog sporazuma na čitavoj teritoriji Bosne i Hercegovine i njenih entiteta”;

**S obzirom na** stav I.2.a Zaključaka navedene Konferencije iz Bona, kojim je utvrđeno “da je nepristrasno i nezavisno

pravosuđe” od “suštinske važnosti za vladavinu zakona i pomirenje u Bosni i Hercegovini”;

**Uzimajući u obzir** Aneks Deklaracije Vijeća za implementaciju mira od 16. decembra 1998. godine, u kojem je Upravni odbor apelirao na potrebu “usvajanje zakona, do 30. juna 1999. godine, kojim bi se uspostavilo nezavisno i nepristrasno pravosuđe, sa akcentom na sudskim i tužilačkim imenovanjima, primjerenim platama i objektivnim standardima za imenovanje sudija i tužilaca, koji će biti u skladu sa istim koji se primjenjuju u evropskoj demokratskoj praksi, te unapređivanju multietničkog pravosuđa širom BiH”;

**Shvatajući** da je relevantno zakonodavstvo donijela Narodna skupština Republike Srpske u aprilu 2000. godine, i da je stupilo na snagu 2. juna 2000. godine;

**Cijeneći** činjenicu da, u vrijeme kada je Nezavisna pravosudna komisija započela sa radom u proljeće 2001. godine, finansijska situacija u pravosuđu bila kritična i da je Nezavisna pravosudna komisija, u bliskoj saradnji sa entitetskim ministarstvima pravde i entitetskim parlamentima, postigla značajno smanjenje godišnjih troškova u sudstvu i tužilaštvu time što je ujedinila tužilačke funkcije, čime je umanjen broj prvostepenih sudova i broj sudija te pomoćnog tehničkog osoblja u pravosuđu;

**Cijeneći** dodatne mjere koje je preduzela Narodna skupština Republike Srpske u oktobru 2003. godine u cilju daljeg smanjenja troškova sudstva i tužilaštva time što su ukinute neke od naknada koje su isplaćivane sudijama i tužiocima kao dodatak na plate;

**Shvatajući** da je finansijska situacija u sudstvu i tužilaštvu na svim nivoima u Bosni i Hercegovini i dalje izrazito kritična i da godišnji troškovi plaća i naknada za sudije i tužioce jasno predstavljaju neproporcionalan dio ukupnih

budžeta;

**Shvatajući** takođe da je trenutno situacija neodrživa i da bi mogla dovesti do kolapsa u pravosuđu u Bosni i Hercegovini;

**S obzirom** da su sudovi i tužilaštva nagomilali znatna dugovanja usljed nedostatka sredstava za pravovremeno izmirenje operativnih troškova i isplatu plata, da je ukupni dug krajem 2004. godine dostigao 16 miliona KM i da su mnogim sudovima bile i u ovom trenutku i dalje jesu uskraćene osnovne usluge – poput pošte i telefona – te da stoga oni nisu funkcionalni niti u mogućnosti da pružaju usluge potrebne građanima Bosne i Hercegovine;

**Svjestan** činjenice da su sudijama i tužiocima u Bosni i Hercegovinie – kao posljedica mehanizama utvrđenih u pozitivnom zakonodavstvu – plaće bile uvećavane za otprilike 40% od prvobitnog povećanja u 2000. godini sve dok plate nisu zamrznute u decembru 2004. godine kada je istovremeno inflacija u Bosni i Hercegovini bila minimalna;

**Uzimajući u obzir** Kominike Upravnog odbora vijeća za implementaciju mira od 3. decembra 2004. godine, u kojem je Upravni odbor naglasio da “efikasan rad pravosuđa, ključni element poslijeratnog oporavka BiH, ovisi o pravilnom funkcioniranju i odgovarajućoj nagrađenosti pravosudnih tijela”, i u kojem je dao svoju punu podršku stavu “da je hitno potrebno izvršiti reviziju plata u pravosuđu da bi se osigurala odgovarajuća raspodjela sredstava koja će omogućiti efikasan rad pravosudnog sistema”.

**Konstatirajući takođe** da je, u cilju izbjegavanja daljeg pogoršanja situacije, visoki predstavnik zamrznuo plate u entitetskom pravosuđu decembra 2004. godine i da je uspostavljena Radna grupa koju čine predstavnici iz ministarstava pravde na nivou entiteta i Bosne i Hercegovine, Pravosudne komisije Brčko Distrikta, Visokog sudskog i

tužilačkog vijeća Bosne i Hercegovine kao i udruženja sudija i tužilaca u oba entiteta sa zadatkom da izvrši reviziju plata u pravosuđu i izradi nove zakonske propise;

**Prihvatajući** preporuke Radne grupe da bi plate sudija i tužilaca trebale biti usklađene između entiteta, da naknade koje su ukinuli entitetski parlamenti 2003. godine ne bi trebalo ponovo uvesti, da bi plate za sudije i tužioce trebale biti umjereno umanjene, da bi sadašnje plate trebale ostati i dalje zamrznute sve dok prosječna plata u Bosni i Hercegovini ne dostigne određeni nivo, te da će, nakon što ponovo počnu da rastu, plate rasti u istom procentu kao i prosječna plata u Bosni i Hercegovini čime će se osigurati fiksni omjer između prosječne plate u Bosni i Hercegovini i plata u pravosuđu kao i dalje usklađivanje između entiteta;

**Prihvatajući** činjenicu da je Visoki sudski i tužilački savjet Bosne i Hercegovine, na svojoj sjednici održanoj 23. avgusta 2005. godine, izrazio podršku preporukama radne grupe;

**Prisjećajući se** Kominikea Upravnog odbora Vijeća za implementaciju mira od 24. juna 2005. godine u kojem je ukazano na to da je Upravni odbor i dalje zabrinut "zbog izazova fiskalne održivosti sa kojim se suočavaju vlasti u BiH, naročito na entitetskom nivou";

**Shvatajući** da je realizacija preporuka radne grupe od ključnog značaja za funkcioniranje pravosudnog sistema u Bosni i Hercegovini i da je u tom pogledu od vrhunske važnosti da se one ostvaruju od početka naredne budžetske godine i to počevši od 1. januara 2006 godine;

Uzevši u obzir i razmotrivši sve navedeno, visoki predstavnik donosi sljedeću:

## **ODLUKU**

**kojom se donosi Zakon o platama i ostalim naknadama sudija i tužilaca u Republici Srpskoj**

koji se nalazi u prilogu Odluke i čini njen sastavni dio.

Taj zakon stupa na snagu kao zakon Republike Srpske danom predviđenim u članu 18. Zakona, osim ako ga Narodna skupština Republike Srpske ne usvoji u istom tekstu, istom obliku i bez izmjena i dopuna ili dodatnih uslova prije 31. decembra 2005. godine. Ako Narodna skupština Republike Srpske usvoji navedeni zakon u drugačijem tekstu, uz izmjene i dopune ili dodatne uvjete, taj zakon neće stupiti na snagu.

U slučaju da Zakon koji je sastavni dio ove Odluke stupi na snagu u skladu sa odredbama ove Odluke, stupiće na snagu na privremenoj osnovi, sve dok ga Narodna skupština Republike Srpske ne usvoji u istom obliku, bez izmjena i dopuna ili bez dodatnih uslova.

Ova odluka stupa na snagu odmah i odmah se objavljuje u "Službenom glasniku Republike Srpske".

Sarajevo,  
2005.

9.

decembar

Paddy Ashdown

predstavnik

Visoki

**ZAKON O PLATAMA I DRUGIM NAKNADAMA  
SUDIJA I TUŽILACA U REPUBLICI SRPSKOJ**

**I**

**OPŠTE ODREDBE**

**Član 1.**

## **Okvir Zakona**

Ovim zakonom utvrđuju se plate, naknade i određena materijalna prava sudija i tužilaca i stručnih saradnikau Republici Srpskoj.

## **II**

### **PLATE, NAKNADE I DRUGA MATERIJALNA PRAVA**

#### **Član 2.**

##### **Osnovna mjesečna plata sudija**

1. Osnovna mjesečna plata sudija iznosi:
  - a) Za sudije osnovnih sudova: 2.400 KM.
  - b) Za šefove odjeljenja osnovnih sudova: 2.600 KM.
  - c) Za predsjednike osnovnih sudova: 2.800 KM.
  - d) Za predsjednike osnovnih sudova sa 30 ili više sudija: 3.200 KM.
  - e) Za predsjednike osnovnih sudova sa 60 ili više sudija: 3.600 KM.
  - f) Za sudije okružnih sudova: 3.000 KM
  - g) Za šefove odjeljenja okružnih sudova: 3.200 KM.
  - h) Za predsjednike okružnih sudova: 3.400 KM.
  - i) Za sudije Ustavnog suda Republike Srpske i sudije Vrhovnog suda Republike Srpske: 3.800 KM.
  - j) Za šefove odjeljenja Ustavnog suda Republike Srpske i Vrhovnog suda Republike Srpske: 4.000 KM.
  - k) Za predsjednike Ustavnog suda Republike Srpske i

Vrhovnog suda Republike Srpske: 4.400 KM.

### **Član 3.**

#### **Osnovna mjesečna plata tužilaca**

1. Osnovna mjesečna plata tužilaca iznosi:
  - a) Za tužioce okružnih tužilaštava: 2.400 KM.
  - b) Za šefove odsjeka okružnih tužilaštava: 2.600 KM.
  - c) Za zamjenike glavnog tužioca okružnih tužilaštava: 3,000 KM.
  - d) Za glavne tužioce okružnih tužilaštava: 3.400 KM.
  - e) Za republičke tužioce: 3.800 KM.
  - f) Za zamjenike glavnog republičkog tužioca: 4.000 KM.
  - g) Za glavnog republičkog tužioca: 4.400 KM.

### **Član 4.**

#### **Osnovna mjesečna plata stručnih saradnika**

1. Osnovna mjesečna plata stručnih saradnika koji obavljaju sudsku funkciju u skladu sa članom 50. stav 2. Zakona o sudovima Republike Srpske iznosi 1.200 KM.
2. Broj stručnih saradnika iz stava 1. ovog člana određuje Visoki sudski i tužilački savjet Bosne i Hercegovine. Stručne saradnike iz stava 1. ovog člana imenuje Visoki sudski i tužilački savjet Bosne i Hercegovine u skladu sa Poslovníkom Visokog sudskog i tužilačkog savjeta i na tom radnom mjestu stručni saradnik ne može provesti više od šest godina.

### **Član 5.**

## **Dodatak na radni staž**

Osnovna mjesečna plata svakog sudije i tužioca iz čl. 2. odnosno 3. ovog zakona i stručnog saradnika iz člana 4. povećava se za 0,5% za svaku punu godinu radnog staža, najviše do 40 godina.

### **Član 6.**

#### **Regulisanje osnovne mjesečne plate**

1. Plate propisane članom 2, 3 i 4. ovog zakona neće se povećavati sve dok prosječna mjesečna neto plata u Bosni i Hercegovini izračunata za kalendarsku godinu ne dostigne ili ne pređe iznos od 800 KM.

2. Počevši od godine koja uslijedi nakon godine u kojoj prosječna mjesečna neto plata u Bosni i Hercegovini izračunata za kalendarsku godinu po prvi put dostigne ili pređe iznos od 800 KM, osnovna mjesečna plata sudija i tužilaca i stručnih saradnika propisana članom 2, 3. odnosno 4. će se godišnje korigovati za procenat povećanja prosječne mjesečne neto plate u Bosni i Hercegovini.

3. Procenat povećanja iz stava 2. ovog člana izračunat će se tako što će se uporediti prosječna mjesečna neto plata u Bosni i Hercegovini za kalendarsku godinu sa prosječnom mjesečnom neto platom u Bosni i Hercegovini iz prethodne kalendarske godine.

4. U slučaju da se u nekoj godini prosječna mjesečna neto plata u Bosni i Hercegovini izračunata za kalendarsku godinu smanji, osnovna mjesečna plata sudija, tužilaca i stručnih saradnika iz člana 4. ovog zakona ostaje ista i neće se ponovo povećavati sve dok prosječna mjesečna neto plata u Bosne i Hercegovini izračunata za kalendarsku godinu ne dostigne najviši nivo od prvog povećanja plata u skladu sa stavom 2. ovog člana. Nakon toga, plate sudija, tužilaca i stručnih saradnika iz člana 4. ovog zakona se povećavaju u skladu sa

stavom 2. ovog člana.

5. Prosječna mjesečna neto plata za kalendarsku godinu biće ona plata koja bude objavljena od strane Agencije za statistiku Bosne i Hercegovine.

## **Član 7.**

### **Radno vrijeme**

1. Broj radnih sati za sudije, tužioce i stručne saradnike iz člana 4. ovog zakona je 40 radnih sati sedmično.

2. Ukoliko sudija, tužilac ili stručni saradnik iz člana 4. ovog Zakona radi pola radnog vremena u skladu sa posebnim zakonom ili propisima, osnovna mjesečna plata iz člana 2. odnosno 3. ovog zakona, korigovaće se u skladu sa brojem odrađenih dana u odnosu prema broju redovnih radnih dana za taj mjesec.

## **Član 8.**

### **Plaćeni godišnji odmor i odsustvo za zadovoljenje vjerskih potreba**

1. Sudije i tužioci imaju pravo na plaćeni godišnji odmor u trajanju od 30 radnih dana, a stručni saradnici iz člana 4. ovog zakona imaju pravo na plaćeni godišnji odmor u trajanju od 20 radnih dana.

2. Pored prava na godišnji odmor definisanog u stavu 1. ovog člana, sudije, tužioci i stručni saradnici iz člana 4. ovog zakona imaju pravo na dva plaćena i dva neplaćena dana odmora godišnje za zadovoljenje vjerskih potreba.

3. Svi sudije i tužioci imaju pravo na neto naknadu za godišnji odmor u iznosu od 50% osnovne mjesečne plate iz tačke a) člana 2. odnosno tačke a) člana 3. ovog zakona. Stručni saradnici iz člana 4. ovog zakona imaju pravo na neto naknadu za godišnji odmor u iznosu od 50% njihove plate utvrđene u

stavu 1. člana 4.

4. Neto naknada za godišnji odmor iz stava 3. ovog člana plaća se kao dodatak na redovnu platu u julu svake godine, bez obzira na to kada se uzima godišnji odmor.

5. Plaćeni godišnji odmor za svakog sudiju, tužioca i stručnog saradnika iz člana 4. ovog zakona bit će regulisan planom godišnjih odmora koji će odrediti predsjednik suda ili glavni tužilac na godišnjoj bazi u skladu sa propisima o unutrašnjem poslovanju predmetnog suda odnosno tužilaštva.

## **Član 9.**

### **Vanredno plaćeno odsustvo**

Pored godišnjeg odmora i odsustva za zadovoljavanje religijskih potreba regulisanog članom 8. ovog zakona, sudije, tužioci i stručni saradnici iz člana 4. ovog zakona imaju pravo na sedam plaćenih dana odmora u kalendarskoj godini kako slijedi:

- (i) U slučaju ženidbe/udaje: 5 dana;
- (ii) U slučaju smrti bliskog srodnika (supružnika, partnera, majke, oca, očuha, maćehe, djeteta, pastorka/pastorke, brata, sestre, polubrata, polusestre): 3 dana;
- (iii) U slučaju smrti manje bliskog srodnika (dede, bake ili bliskog srodnika bračnog druga ili partnera): 1 dan;
- (iv) U slučaju rođenja djeteta: 2 dana;
- (v) U slučaju selidbe iz stalnog prebivališta u drugo prebivalište: 1 dan.

## **Član 10.**

### **Plaćeno odsustvo**

1. Visoki sudski i tužilački savjet može odlučiti da sudija odnosno tužilac nastavi primati platu tokom odsustva koje mu odobri Visoki sudski i tužilački savjet u skladu sa članom 17. tačkom 13. Zakona o Visokom sudskom i tužilačkom savjetu Bosne i Hercegovine ("Službeni glasnik Bosne i Hercegovine", br. 25/04).

2. Visoki sudski i tužilački savjet u saradnji sa Ministarstvom pravde Republike Srpske donosi propise u vezi sa okolnostima pod kojim sudija odnosno tužilac nastavlja primati platu tokom odsustva definisanog u stavu 1. ovog člana.

## **Član 11.**

### **Naknada prilikom odlaska u penziju**

Sudije i tužioci imaju pravo na jednu osnovnu mjesečnu platu kao naknadu prilikom odlaska u penziju, kao što je to propisano u članu 2. odnosno 3. ovog zakona.

## **Član 12.**

### **Zdravstveno osiguranje i bolovanje**

Sudije, tužioci i stručni saradnici iz člana 4. ovog zakona imaju pravo na zdravstveno osiguranje i bolovanje u skladu sa važećim Zakonom o zdravstvenom osiguranju u Republici Srpskoj.

## **Član 13.**

### **Penzijsko i invalidsko osiguranje**

Sudije, tužioci i stručni saradnici iz člana 4. ovog zakona imaju pravo na penzijsko i invalidsko osiguranje u skladu sa važećim Zakonom o penzijskom i invalidskom osiguranju u Republici Srpskoj.

## **Član 14.**

### **Naknada za putne troškove**

Sudije, tužioci i stručni saradnici iz člana 4. ovog zakona imaju pravo na naknadu za putne troškove u skladu sa propisima o unutrašnjem poslovanju suda ili tužilaštva i odobrenim budžetom suda odnosno tužilaštva.

### **Član 15.**

#### **Naknada za troškove edukacije**

Sudije, tužioci i stručni saradnici iz člana 4. ovog zakona imaju pravo na naknadu za troškove nastale u toku edukacije u skladu sa propisima o unutrašnjem poslovanju suda ili tužilaštva i odobrenim budžetom suda ili tužilaštva

### **Član 16.**

#### **Naknada za upućivanje u drugi sud sa ili bez pristanka sudije**

U slučaju upućivanja sudije da vrši dužnost sudije u drugom sudu u skladu sa članom 50. ili 51. Zakona o visokom sudskom i tužilačkom savjetu, taj sudija ima pravo na naknadu za troškove u skladu sa odredbama koje donese Visoki sudski i tužilački savjet u saradnji sa Ministarstvom pravde Republike Srpske.

## **III**

### **ZAVRŠNE ODREDBE**

### **Član 17.**

#### **Stavljanje odredbi van snage**

Odredbe sadržane u drugim zakonima, propisima ili odlukama Republike Srpske koje su u suprotnosti s odredbama ovog zakona prestaju da važe danom stupanja na snagu ovog zakona.

### **Član 18.**

## **Objavljivanje i stupanje na snagu**

Ovaj zakon stupa na snagu 1.1.2006. godine.